

劍南詩稿

冊十四

劍南詩稿卷第六十一

宋陸游務觀

乙丑元旦

好在屠蘇酒扶衰把一卮家貧爲壽略曆閏換年遲
薦廟須扶拜題門強綴詩惟思買春困熟睡過花時
俗有賣春困者予老憊思睡故欲買之

元日讀易

伏羲三十餘萬歲傳者太山一毫芒春秋雖自魯麟
絕禮樂蓋先秦火亡孟軻財能道封建孔子已不言
鴻荒於庠易學幸未泯安得名山處處藏

自開歲陰雨連日未止

江雲漠漠雨昏昏歸老山陰學灌園十里羊腸僅通
路三家鐺腳自成村應時鱠飪聊從俗耐久鍾馗儼
在門近縣傳聞頗多盜呼兒插棘補頽垣俗有年鱠飪

之語予貧甚今歲遂不能易鍾馗

枯菊

翠羽金錢夢已闌空餘殘藥抱枝乾紛紛輕薄隨流水黃與姚花一樣看

又

積雪嚴霜轉眼空春回無處不春風欲知造物無窮妙但看萱根與菊叢

村舍雜興

冉冉年華速昏昏睡思濃廢書心自愧謝病客能容雨急鐘微度溪湍確自春可憐燈下影隨處伴衰慵

又

堅臥非由病端居不是齋世情元自薄人事固多乖晨飯炊秣米宵行點豆藍昔人言可用第一忌安排徐仲車有請問于安定先生先生曰莫安排

又

白首返吾鄉功名罷激昂掃除魔眷屬砭熨病膏肓

老圃勤供菜蠻童解炷香黃昏那用問且喜日舒長
又

粥罷重投枕晨起粥後再睡最佳燈殘起讀書閉門常
自得作計更誰如箭茁白於玉櫻花長比魚盤殮有
此味勿怪食無餘

又

遊宦風波惡還家日月長厭煩思病忘避俗欲陽狂
絕意功名會收身翰墨場箸書吾豈敢尚可述農桑

夜興

窮巷行人絕高城漏鼓稀劇談頻翦燭久坐旋更衣
飢鼠衝人過啼鴉冒夜飛客歸吾未睡孤影自相依
示鄰曲

北陌東阡好弟兄耄年幸復主齊盟同嘗春韭秋菘
味共聽朝猿夜鶴聲百世不忘耕稼業一壺時敘里
閭情諸孫識字吾真足安用鵬搏九萬程

夢中作

華山敷水本閑人一念無端墮世塵八十餘年多少
事藥爐丹竈尚如新

春雨

倚闌正爾受斜陽細雨霏霏渡野塘本爲柳枝留淺
色却教梅蘂洗幽香小霑蝶粉初何惜暫澀鶯聲亦
未妨造物無心寧徧物憑誰閑與問東皇

艸堂

幸有湖邊舊艸堂敢煩地主築林塘辛幼安每欲爲築舍
予辭之遂止漉殘醅食葛巾漉插遍野梅紗帽香風緊
春寒那可敵身閑晝漏不勝長浩歌陌上君無怪世
譜推原自楚狂陸氏舊譜云本出接輿後

道室

簪遇風山第六爻脩然盡謝俗間交謀生舊買雲三
頃託宿新分鶴半巢露下丹芽生藥壠月明金粉落
松梢眉間喜動君知否借得丹經手自抄

旅次有贈

黃鶴樓前逢劍客，青衣江口見詩人。
天涯莫起漂零感，物外終爲自在身。
賣馬求船雖少日，阻風中酒動兼旬。
中原早晚胡塵靜，緱月嵩雲要卜鄰。

雜感五首以不愛入州府爲韻

莘渭二老人，耕釣俱白首。
功烈在人間，如天有北斗。
方其未遇時，自處固不苟。
夫豈邀虛名，欲眩千載後。
降及秦漢王，望古猶培塿。
猶能守所聞，外物不得誘。
君看魯二生，亦豈聖人偶。
凜然諸儒間，人可我獨不。

又

山棲天與癖，酒復甚所愛。
雖云慚黃綺，亦慕稽阮輩。
失腳落人間，二事略皆廢。
晚歸臥雲壑，謂此在券內。
如何疾屢作，大與初意背。
好山雖在眼，動步輒有礙。
酒戒復堅持，如隄憂蟻潰。
何以遣餘年，閉戶淡煮菜。

又

鷺鳩搶榆枋，枯魚過河泣。
鵬鯤九萬里，此豈汝所及。
丈夫志古人，絕世而獨立。
遠遊馬蹏穿高臥，劍鋒澀。

其初所抱負固自高業安能與兒曹俛首就維繫
君看折腰趨孰若舉手揖芝老尚可餐修門戒輕入

又

涪水初平時艸木充九州禽獸孳育繁與人爲敵讎
于時聖人作日夜爲民憂思有以勝之食肉而服裘
然後人奠居禾黍歲有秋豈知千載後戕殺無時休
一食刀机赤百味供膳羞豪侈方相誇哀哉非始謀

又

我年甫三十出身事明主狂愚斥不用晚辟征西府
蹭蹬過錦城邂逅客嚴武十年醉鄴筒陽狂頗自許
青城訪隱翁西市買幽圃如何復不遂歸聽鏡湖雨
結廬三間茅泛宅一枝牖天真儻可全吾其老煙浦

自詠絕句

雙鬢蕭條失故青躬耕猶得養餘齡明時恩大無由
報欲爲鄉鄰講孝經

又

深村人有結繩風晚歲身爲帶索翁
啜粥茹蔬茅屋底誰知也過百年中

又

不淪鬼錄不登仙遊戲杯觴近百年
小市跨驢寒日裏任教人作畫圖傳

又

逆旅門前撥不開先生醉策蹇驢來
未言乞得囊中藥一見童顏且壓災

又

遠遊索手不賫糧薪米臨時取道傍
今日晴明行亦好經旬風雨住何妨

又

一條紙被平生足半盃藜羹百味全
放下元來總無事雞鳴犬吠送殘年

又

平生寧獨愛吾廬何處茅簷不可居
晝闕僮奴停接

客夜無膏火罷觀書

又

睡著何曾厭夜長老人少睡坐何傷無燈無火春寒惡破絮麤氈卽道場

風月吟

去日如馳衰有驗萬事惟當就收歛可憐未與酒相忘風月婆娑猶不厭有時清夜行中庭幅巾藜杖影吟未已爽透髮根清入齒晨光底事不貸人輓轡汲水啼鶚起

年光

無賴年光逐水流人間隨處送悠悠千帆落浦湘天晚孤笛吟風鄂縣秋小市鶯花時痛飲故宮禾黍亦閑愁久留只恐驚凡目又向西涼上酒樓

龜堂

莫笑龜堂陋生涯實有餘春寒擁重褐晨飯富藏蔬

薄技雕蟲爾虛名畫餅如兒時論語在敢負此心初
春晴

春如人易老愁與漏俱長酒著多思睡花熏直欲狂
新晴乾蝶翅微暖滑鶯吭誰見龜堂叟搭藤送夕陽
閉門

殘髮凋零不滿巾閉門聊得養天真恐傷藥艸停除
地爲惜松槎禁伐薪獨木架成新略約一峯買得小
嶙峋蕭然便覺渾無事談笑時時過近鄰

又

衰疾厭厭不易醫閉門惟與睡相宜狂曾忤物慵迎
客瘦不勝衣悔作詩數簡隱書忘世味半甌春茗過
花時寂寥終歲君無諠正是幽居一段奇

有所感

世事真成風馬牛細思愈覺此生浮舊交散後知心
少行路難來出戶愁氣節陵夷誰獨立文章衰壞正
橫流魯中狂士今安有淚盡朱雲艸滿丘

八十一吟

八十古云耄吾今不啻過山程兩芒屨水宿一漁蓑
雞唱劉琨舞牛疲甯戚歌春寒欺短褐將奈此翁何
高吟

食少支撐惟恃粥力衰舉動輒須人誰知造物猶遺
漏擁鼻高吟又一春

湖上作

耳目聰明手足輕應酬幽事未忘情百年日向漁樵
過千里雲從几席生樽酒每招鄰父共圖書時與小
兒評但餘煙水無儔侶堪笑沙鷗欲抗衡

賞花

湖上花光何處尋朱朱白白自成林衰翁何預傷春
事閑客猶懷愛物心欲墮每愁風驟起正開却要日
微陰蘭亭禹廟平生事一榼芳醪莫厭深

園廬

天假殘年使荷鋤白頭父子守園廬四朝曾遇千齡

會七世相傳一束書物理從來多倚伏人情莫遣得
親疎功名自有英雄了吾輩惟當憶遂初

乍晴行西村

堤樹叢祠北煙村古埭南買魚論木盎挑薺滿荆籃
積潦經旬月晴光見二三農功殊可念保麥復祈蠶
書數

塵甑炊畚粟羸僮策蹇驢自從行卷日直至挂冠餘
揣分元知止求官實抱虛園蔬幸無恙父子日攜鋤
新製小冠

淺醉微吟獨倚闌輕雲淡月不多寒悠然顧影成清
歡新製柈欄二寸冠

又

柈欄冠子輕宜髮練布單衣爽辟塵縱不能詩亦堪
畫年餘八十水雲身

書逆旅壁

市遠過三里店孤無四鄰窄纔容一客久或住經旬

病軀求風藥樵兒餽爨薪人情愈諳熟來往不辭頻
倚樓

曲曲闌干縹緲間哦詩本欲破除閑無端又起天涯
感淡墨生綃數點山

又

樓上憑闌小立時淡煙漠漠雨絲絲年光日日有佳
處不解春寒偏入詩

小雨

小雨明復聞餘寒去又來新苔緣砌上殘杏過籬開
垂老身餘幾逢春心尚孩江天近寒食林外過輕雷

書歎

無能自號癡頑老尚健人驚矍鑠翁未向松根藏病
骨尚尋花底醉春風翩翩孤影如歸鶴冉冉流年付
斷蓬曾謁高皇識隆準傷心無復一人同

紹興朝士自

周丞相下世獨予尚在爾

遷雞柵歌

烏雞買來逾歲年庭中赤牘何昂然吾孫初生畏晨
唱家人共議欲汝捐烏窮必啄奴豈憚雞賣將烹吾
所憐貴人賤畜雖古訓物理寧不思兩全舊棲況亦
苦沮洳新柵幸可圖完堅東園稍去房輿遠挾雌將
雛從此遷竹簟朝莫有餘粒瓦缶亦自盛清泉啾啾
風雨守汝職膈膊勿恤驚吾眠

春興

暖靄催桑眼睛光長艸心沙平看臥犢密葉聽鳴禽
買酒貧爲祟登山病不禁終年惟一褐捫蝨又春深

小園

蕭散遺塵事栽培得小園土鬆花意活林暖鳥言繁
飧酪供晨鉢蒔芹薦晚樽餘年君莫問送老向孤村
二月晦日夜夢欲卜居近邑道遇老父告以不
利欣然從之

夢中行卜居道遇白髯叟一面出苦言戒我棄勿取
人之生實難失腳墮虎口我深感其言解衣奉杯酒

豈知立談間得此直諒友起坐心茫然天闕樓挂斗
新晴

苦雨幾終月新晴喜夕陽扶行呼稚子隨意下茅堂
艸茂知麋健巢新覺燕忙興闌歸亦好袖手獨焚香

病中作

苦雨侵衰骨餘寒著弊裘病多辭社飲貧甚輟春遊
日日親蔬圃時時弄釣舟回頭語造物與子兩無求
示子適

敢恨吾生後聖賢六經雖缺尚成編本來堯舜身親
見孰謂丘軻道不傳妙理豈求逢腋外淳風寧在結
繩前此身未死還堪勉更伴吾兒學數年

窮居

羸病無時已窮居只自悲巾偏非雨墊衣弊豈塵縑
米盡時炊稗樽空慣啜漓逐貧雖有賦乞食未成詩

春晚自近村歸

山陰道上柳如絲策蹇悠悠信所之曲水已過修禊

集餘寒不減試燈時貧猶自力常謀醉病不能閑日
賦詩誰道茅簷苦幽獨一鉤新月是相知

開孫滿月

夜夢奇童拜且言今乃幸得生高門夢後一日得開
孫虎兒墮地百獸奔未論頭角與眉宇但聽啼聲誰
敢侮就令長大未必奇亦作人間孔文舉

小築

西郊小築臨煙汀南山秀色入窗櫺朝鐘暮鼓在何
許乃是會稽山陰之蘭亭堂中老人白鬚鬢手扶藤
杖垂九齡客來不語坐至夕往者絕物今忘形牆隅
老雞新樹柵長號催上東方星老人亦起穿兩屨巖
泉漱齒讀黃庭

春晚歎

一風已快晴微雲復成雨盛麗女郎花坐看委泥土
蜂房蜜已熟科斗生兩股堂堂一年春結束聽杜宇
老夫久臥疾乃復健如許便當裹米糲爛醉作端午

鷓鴣

翩然一鴉升，倏爾一鴉下。非惟飽殘餘，亦可免彈射。
巡簷攫脯脩，入舍掠膾炙。嗟汝無盈厭，坐是取驅嚇。
物情貴能改，一眚亦可貰。併語黃雀羣，勿輕敗吾稼。

舍東四詠

疎籬

數掩圍柴荆，王維畫不成。尤憐月中影，特地起詩情。

松棚

松棚尋丈地，客至共開顏。堪笑杜陵老，坐思千萬間。

盆池

寒溜初通後，新荷未長時。誰持大圓鏡，爲我照鬚眉。

小徑

環遶無十步，捷行財半之。安西九千里，自有著鞭時。

示元敏

學貴身行道，儒當世守經。心心慕繩檢，字字講聲形。
吾已鬢眉白，汝方衿佩青。良時不可失，苦語直須聽。